

পড়া শুরু রবের নামে

আসসালামু আলাইকুম, ছোট্ট বন্ধুরা! তোমরা কেমন আছ? আজ থেকে আমরা কুরআনের সুন্দর সুন্দর কিছু আয়াত পড়ব। আজ আমরা পড়ব কুরআনের সর্বপ্রথম আয়াত। চলো, আয়াতটা পড়ি—

إِقْرَأْ بِاسْمِ رَبِّكَ الَّذِي خَلَقَ

(ইক্করা' বিসমি রব্বিকাল্লামী খলাক)

অর্থ: পড়ো তোমার রবের নামে, যিনি সৃষ্টি করেছেন।

(সূরা আলাক, আয়াত ১)

এখন থেকে তোমরা পড়া শুরুর আগে আল্লাহর নাম স্মরণ করবে। এতে পড়ার কাজটাও ইবাদতে পরিণত হবে। মনে থাকবে তো?



আল্লাহর রাস্তায় খরচ করি

দুনিয়ার ধন-সম্পদের মালিক আমরা নই। এগুলোর মালিক আল্লাহ তাআলা। তাঁর দেওয়া সম্পদ তাঁর আদেশ অনুযায়ী ব্যয় করতে হবে। আল্লাহ তাআলা বলেন,

وَأَنْفِقُوا فِي سَبِيلِ اللَّهِ

(ওয়া আংফিকু ফী সাবীলিল্লা-হ)

অর্থ: আর তোমরা আল্লাহর রাস্তায় ব্যয় করো।

(সূরা বাকারা, আয়াত ১৯৫)

এ আয়াত থেকে আমরা বুঝতে পারলাম, ধন-সম্পদ আল্লাহর রাস্তায় খরচ করতে হবে। এটা আল্লাহর নির্দেশ। এই কাজ করলে আল্লাহ তাআলা খুশি হবেন। সম্পদে বরকত দেবেন।



২.১

ধ্বংস থেকে বেঁচে থাকি

আল্লাহর আদেশ-নিষেধ মেনে চলা জরুরি। কারণ, তাঁর কথার অবাধ্য হলে আমরা জাহান্নামে যাব। চিরস্থায়ী আগুনে জ্বলতে থাকব। আল্লাহর অবাধ্যতা আমাদের ধ্বংস ডেকে আনবে। এ কারণেই আমাদের রব বলেছেন,

وَلَا تُلْقُوا بِأَيْدِيكُمْ إِلَى التَّهْلُكَةِ

(ওয়াল্লা- তুলক্বু বিআইদীকুম ইলাত তাহলুকাহ)

অর্থ: আর নিজ হাতে নিজেদেরকে ধ্বংসের মুখে ঠেলে দিয়ো না।

(সূরা বাকারা, আয়াত ১৯৫)

আল্লাহর আদেশ অমান্য করা অনেক বড় অন্যায়। বারবার এমন অন্যায় করলে ধ্বংস অনিবার্য। তাই আমরা আল্লাহর আদেশ মেনে চলব। তাহলেই ধ্বংস হওয়া থেকে বেঁচে যাব।



ভালো ভালো কাজ করি

ভালো কাজ করতে ইসলাম আমাদের উৎসাহ দেয়। যে ভালো কাজ করে, আল্লাহ তাকে ভালোবাসেন। মানুষও তাকে পছন্দ করে। কুরআনে আল্লাহ তাআলা ভালো কাজ করতে আদেশ দিয়েছেন। তিনি বলেছেন,

وَأَحْسِنُوا إِنَّ اللَّهَ يُحِبُّ الْمُحْسِنِينَ

(ওয়া আহসিনু, ইন্নাল্লা-হু ইউহিব্বুল মুহসিনীন)

অর্থ: এবং কল্যাণকর কাজ করো। নিশ্চয় আল্লাহ
সৎকর্মশীলদের ভালোবাসেন।

(সূরা বাকারা, আয়াত ১৯৫)

ছোট বন্ধুরা, তোমরা তোমাদের প্রতিবেশী, আত্মীয়-স্বজন এবং সব মুসলিমদের উপকার করার চেষ্টা করবে। অন্যের উপকার করা ভালো কাজ। এতে আল্লাহর ভালোবাসা পাবে। খেয়াল থাকবে তো তোমাদের?



কাউকে কষ্ট দেব না

কাউকে কষ্ট দেওয়া গুনাহের কাজ। দান করার পর খোঁটা দেওয়াও খুব জঘন্য অপরাধ। এসব করলে আল্লাহর কাছ থেকে সওয়াব পাওয়া যায় না। আল্লাহ তাআলা এসব কাজ করতে আমাদের নিষেধ করেছেন। তিনি বলেছেন,

لَا تُبْطِلُوا صَدَقَاتِكُمْ بِالْمَنِّ وَالْأَذَى

(লা-তুবত্বিলু সদাকা-তিকুম বিলমন্নি ওয়ায়ল আযা-।)

অর্থ: তোমরা খোঁটা ও কষ্ট দেওয়ার মাধ্যমে
তোমাদের সদাকা বাতিল করো না।

(সূরা বাকারা, আয়াত ২৬৪)

বন্ধুরা, তোমরা কাউকে কষ্ট দেবে না। ভুলে কাউকে কষ্ট দিয়ে ফেললে ক্ষমা চাইবে। এতে আল্লাহ তোমাদের উপর খুশি হবেন। মনে থাকবে তো?



সাক্ষ্য গোপন করব না

সাক্ষ্য গোপন করা খুবই অন্যায়। এর ফলে বিচারক ন্যায়বিচার করতে পারেন না। এভাবে বিচারপ্রার্থীর ওপর জুলুম করা হয়। আল্লাহ এসব অন্যায় থেকে বিরত থাকতে বলেছেন। আল্লাহ তাআলা বলেন,

وَلَا تَكْتُمُوا الشَّهَادَةَ

(ওয়াল্লা- তাকতুমুশ শাহা-দাহ।)

অর্থ: আর তোমরা সাক্ষ্য গোপন করো না।

(সূরা বাকারা, আয়াত ২৮৩)

বন্ধুরা, তোমরা কখনো সাক্ষ্য গোপন করবে না। মিথ্যা সাক্ষ্যও দেবে না। অন্যের ওপর জুলুম করবে না। তাহলে আল্লাহ তোমাদের ওপর খুশি হবেন।



ভরসা করি আল্লাহর ওপর

কাজ করার সময় আল্লাহর ওপর ভরসা করতে হবে। কারণ কাজের সফলতা ও ব্যর্থতা আল্লাহর হুকুমের ওপরেই নির্ভর করে। তাই সব কাজেই তাঁর উপর ভরসা করতে হবে। আল্লাহ তাআলা বলেন,

فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ

(ফাইযা- 'আযামতা ফাতাওয়াক্কাল 'আলাল্লা-হা ইন্নাল্লা-হা ইউহিব্বুল মুতাওয়াক্কিলীন)

অর্থ: অতঃপর তুমি যখন সংকল্প করো তখন আল্লাহর প্রতি নির্ভর করো। নিশ্চয়ই আল্লাহ তাঁর ওপর ভরসাকারীদের ভালোবাসেন।

(সূরা আলে ইমরান, আয়াত ১৫৯)

বন্ধুরা, তোমরা সব কাজ আল্লাহর ওপর ভরসা করে করবে। এতে কাজে বরকত হবে। আর আল্লাহও তোমাদের ভালোবাসবেন।



অহংকার থেকে দূরে থাকি

অহংকার করা খুবই খারাপ একটা কাজ। অহংকারী লোককে কেউ পছন্দ করে না। সবাই তার কাছ থেকে দূরে থাকতে চায়। আল্লাহ তাআলাও এমন ব্যক্তিকে পছন্দ করেন না। তিনি বলেন,

إِنَّ اللَّهَ لَا يُحِبُّ مَنْ كَانَ مُخْتَالًا فَخُورًا

(ইয়ালা-হা লা- ইউহিব্বু মান্ কা-না মুখতা-লাং ফাখুরা-।)

অর্থ: নিশ্চয় আল্লাহ দাস্তিক ও অহংকারীকে পছন্দ করেন না।

(সূরা নিসা, আয়াত ৩৬)

বুঝেছ বন্ধুরা, তোমরা কখনোই অহংকার করবে না। তাহলে আল্লাহ তোমাদের ভালোবাসবেন। মানুষও তোমাদের অনেক পছন্দ করবে।



ঢল্লো তাকওয়া অর্জন করি

সন্মান পাওয়ার জন্যে আমরা কতকিছুই-না করি। কিন্তু আল্লাহর কাছে সন্মান পেতে হলে কেবল একটি কাজই যথেষ্ট। কিভাবে আল্লাহর কাছে বেশি মর্যাদা পাওয়া যাবে, সেটা কুরআনে বলে দিয়েছেন তিনি। আল্লাহ বলেন,

إِنَّ أَكْرَمَكُمْ عِنْدَ اللَّهِ أَتْقَىٰكُمْ

(ইন্না আকরমাকুম 'ইংদালা-হি আতকা-কুম)

অর্থ: তোমাদের মধ্যে আল্লাহর কাছে সে লোকই অধিক সন্মানিত, যে অধিক তাকওয়াবান।

(সূরা হুজুরাত, আয়াত ১৩)

আল্লাহর ভয় যার ভেতর যত বেশি, সে আল্লাহর কাছে তত বেশি সন্মানিত। তাই আমাদের উচিত আল্লাহকে বেশি বেশি ভয় করা। তাহলে আল্লাহর কাছে আমরা অনেক মর্যাদাবান হয়ে যাব। মনে থাকবে তো, বন্ধুরা?



আল্লাহ জানেন সবকিছু

এই জগতে যা কিছু ঘটে, সবই আল্লাহ তাআলা জানেন। প্রকাশ্য বা গোপন সবকিছুই তাঁর জানা আছে। আল্লাহ তাআলা একটি উদাহরণের মাধ্যমে বিষয়টি আমাদেরকে বুঝিয়ে দিয়েছেন। তিনি বলেন,

وَمَا تَسْقُطُ مِنْ وَرَقَةٍ إِلَّا يَعْلَمُهَا

(ওয়ামা- তাসকুতু মিন ওরাকতিন ইল্লা- ইয়া'লানুহা-)

অর্থ: তাঁর অগোচরে গাছের একটি পাতাও বারে পড়ে না।

(সূরা আনআম, আয়াত ৫৯)

আল্লাহ তাআলা জগতের সবকিছুই জানেন। তাঁর অজ্ঞাতসারে গাছ থেকে একটি পাতাও বারে পড়ে না। আমরা আল্লাহর ব্যাপারে এই বিশ্বাসই লালন করব। এতে আমাদের ঈমান মজবুত হবে।



আল্লাহকে দিই উত্তম ঋণ

দান-সদাকা একটি উত্তম আমল। সদাকার আমলে আল্লাহর রাগ প্রশমিত হয়। আল্লাহর রাস্তায় ব্যয় করার প্রতি অনেক উৎসাহ দেওয়া হয়েছে। তেমনই একটি আয়াত আমরা জানব এখন। আল্লাহ তাআলা বলেন,

وَأَقِيمُوا الصَّلَاةَ وَآتُوا الزَّكَاةَ وَأَقْرِضُوا اللَّهَ قَرْضًا حَسَنًا

(ওয়াআক্কীমুস সলা-তা ওয়াআ-তুযযাকা-তা ওয়াআক্করিদ্দুল্লা-হা করদান হাসানা-)

অর্থ: আর নামাজ কায়েম করো, যাকাত দাও এবং আল্লাহকে উত্তম ঋণ দাও।

(সূরা মুযযামিল, আয়াত ২০)

আল্লাহর রাস্তায় খরচ করলে আল্লাহ তাআলা তা সাতশো গুণ পর্যন্ত বাড়িয়ে দেন। বুঝলে তো, দান-সদাকার গুরুত্ব কত? এখন থেকে বেশি বেশি সদাকা করবে। আল্লাহ এতে অনেক খুশি হবেন।



২৭.১

ক্ষমা চাইব আল্লাহর কাছে

আল্লাহর একটি সুন্দর গুণবাচক নাম হচ্ছে 'গফুর'। অর্থাৎ আল্লাহ ক্ষমাশীল। আল্লাহ তাআলা ক্ষমা করতে পছন্দ করেন। তাই তিনি তাঁর গুনাহগার বান্দাদেরকে তাঁর কাছে ক্ষমা চাইতে বলেছেন। তাওবা ও ইস্তিগফারের মাধ্যমে আমরা আমাদের গুনাহগুলো ক্ষমা করিয়ে নিতে পারি। আল্লাহ বলেছেন,

وَاسْتَغْفِرُوا لِلَّهِ إِنَّ اللَّهَ غَفُورٌ رَحِيمٌ

(ওয়াসতাগফিরুল্লা-হ, ইমাল্লা-হা গফুরর রহীম)

আর তোমরা আল্লাহর কাছে ক্ষমা চাও। নিশ্চয় আল্লাহ
অতীব ক্ষমাশীল, পরম দয়ালু।

(সূরা মুযাম্মিল, আয়াত ২০)

আমরা গুনাহ করলে অনুতপ্ত হব। আল্লাহর কাছে কাকুতি-মিনতি করে দুআ করব। ক্ষমা চাইব। এতে আল্লাহ তাআলা আমাদের মাফ করে দেবেন। মনে থাকবে তো, বন্ধুরা?



ভালো মুসলিম হতে হতে

পূর্ণ মুসলিম হতে চাইলে ইসলামের সব বিধি-বিধান মেনে চলতে হবে। কিছু মানলাম, আর কিছু মানলাম না এমনটা হওয়া যাবে না। মৃত্যুর আগেই তাই ইসলামে পরিপূর্ণভাবে প্রবেশ করতে হবে। আল্লাহ তাআলা বলেন,

يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَ
لَا تَمُوتُنَّ إِلَّا وَأَنْتُمْ مُسْلِمُونَ

(ইয়া-আইয়ুহা-ল্লাযীন আ-নানুত্-তাক্বা-ল্লাহ-হা হাক্বা তুকা-তিহী ওয়ালা- তামূতুনা ইক্বা- ওয়াআতুর্ম মুসলিমূন)

অর্থ: হে মুমিনগণ! আল্লাহকে ভয় করো যেমনভাবে তাঁকে ভয় করো উচিত। এবং তোমরা মুসলিম না হয়ে মৃত্যুবরণ করো না।

(সূরা আলে ইমরান, আয়াত ১০২)

ছোট্ট বন্ধুরা, তোমরা সবসময় আল্লাহকে ভয় করে চলবে। ইসলামের সকল বিধি-বিধান মেনে চলবে। এভাবেই পরিপূর্ণভাবে মুসলিম হতে পারবে।



কথার সাথে কাজের মিল

কথার সাথে কাজের মিল থাকাটা ভালো মানুষের গুণ। আল্লাহ তাআলা চান আমরা ব্যক্তি হিসেবে আদর্শ মুসলিম হই। আমরা যেন তা-ই বলি, যা নিজেরা করি। নিজে না করে কেবল অন্যকে উপদেশ দিয়ে যাওয়া মুমিনের চরিত্র নয়। আল্লাহ তাআলা বলেন,

كَبُرَ مَقْتًا عِنْدَ اللَّهِ أَنْ تَقُولُوا مَا لَا تَفْعَلُونَ

(কাবুরা মাক্কতান 'ঈংদাল্লা-হি আং তাক্বুলূ মা- লা- তফ'আলুন)

আল্লাহর দৃষ্টিতে এটা অত্যন্ত নিন্দনীয় ব্যাপার যে,
তোমরা এমন কথা বলো যা তোমরা করো না।

(সূরা সফ, আয়াত ৩)

আমরা অন্যদের যা যা উপদেশ দেব, সেগুলো নিজেরাও মেনে চলার চেষ্টা করব। তাহলে আল্লাহ আমাদের ভালবাসবেন।



তাওবা করি বেশি বেশি

প্রতিনিয়তই আমরা গুনাহ করছি। আল্লাহর আদেশ অমান্য করছি। এরকম অবস্থায় ইস্তিগফারই হলো গোনাহ মফেরের উপায়। এর মাধ্যমেই আমরা আল্লাহর শাস্তি থেকে রেহাই পেতে পারি। আল্লাহ তাআলা বলেন,

وَمَا كَانَ اللَّهُ لِيُعَذِّبَهُمْ وَأَنْتَ فِيهِمْ وَمَا كَانَ
اللَّهُ مُعَذِّبَهُمْ وَهُمْ يَسْتَغْفِرُونَ

(ওয়ামা- কা-নাআলা-হু লিইয়ু'আযযিবাহুম ওয়াআন্তা ফীহিম, ওয়ামা- কা-নাআলা-হু মু'আযযিবাহুম ওয়াহুম ইয়াসতাগফিরুন)

অর্থ: (হে নবি) আপনি তাদের মাঝে থাকা অবস্থায় আল্লাহ তাদেরকে শাস্তি দিবেন না এবং যখন তারা ক্ষমা প্রার্থনা করতে থাকবে এমন অবস্থায় ও আল্লাহ তাদেরকে শাস্তি দিবেন না।

(সূরা আনফাল, আয়াত ৩৩)

আমরা বেশি বেশি ইস্তিগফার করব। গুনাহ করে ফেললে সাথে সাথেই তাওবা করব। এতে আল্লাহর শাস্তি থেকে বেঁচে যাব। মনে থাকবে তো, বন্ধুরা?



চলো সৎকর্মশীল হই

আল্লাহ তাঁর প্রিয় বান্দাদের অনেক গুণ নিয়ে আলোচনা করেছেন। এখানে আমরা তেমনই একটি আয়াত পড়ব। এই আয়াতে সৎকর্মশীল বান্দাদের তিনটি গুণের কথা উল্লেখ করা হয়েছে। আল্লাহ তাআলা বলেন,

الَّذِينَ يُنْفِقُونَ فِي السَّرَّاءِ وَالضَّرَّاءِ وَالْكُظَيْبِ
الْغَيْظِ وَالْعَافِينَ عَنِ النَّاسِ وَاللَّهُ يُحِبُّ الْمُحْسِنِينَ

(আল্লাহীনা ইউফীক্বনা ফিসসাররা-ই ওয়াছদ্বররা-ই ওয়াল কা-যিমীনাগ গইয়া ওয়াল
'আ-ফীনা 'আনিলা-স, ওয়াল্লা-হ ইউহিব্বুল মুহসিনীন)

অর্থ: যারা সচ্ছল ও অসচ্ছল সব অবস্থায় সম্পদ ব্যয় করে এবং যারা
ক্রোধ দমন করে ও অন্যের ভুল-ত্রুটি মাফ করে দেয় —এ ধরনের
সৎলোকদের আল্লাহ অত্যন্ত ভালোবাসেন।

(সূরা আলে ইমরান, আয়াত ১৩৪)

ছোট বন্ধুরা, আমরা আল্লাহর রাস্তায় ব্যয় করব। রাগ দমন করব এবং মানুষকে ক্ষমা করে দেব। এভাবে আমরা সৎকর্মশীল বান্দা হতে পারব। আর আল্লাহর ভালোবাসাও পাব।

